



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080193925733417

966

27 / მარტი / 2017 წ.

საქართველოს განათლებისა და მეცნიერების სამინისტროსთვის სახელმწიფო შესყიდვის გამარტივებული შესყიდვით განხორციელების შესახებ თანხმობის გაცემის თაობაზე

აღწერილობითი ნაწილი

1. ინფორმაცია მომართვის თაობაზე

სახელმწიფო შესყიდვების სააგენტოში (შემდგომში – სააგენტო) 2017 წლის 23 მარტს სახელმწიფო შესყიდვების ერთიანი ელექტრონული სისტემის SMP მოდულის მეშვეობით წარმოდგენილ იქნა საქართველოს განათლებისა და მეცნიერების სამინისტროს SMP170000849 მომართვა სახელმწიფოებრივი და საზოგადოებრივი მნიშვნელობის ღონისძიების შეზღუდულ ვადებში შეუფერხებლად ჩატარების საფუძვლით გამარტივებული შესყიდვის განხორციელებაზე თანხმობის გაცემის შესახებ.

2. შესყიდვის ობიექტი და მისი ღირებულება

მომართვის მიხედვით, შესყიდვის ობიექტია მცირე კონტიგენტაანი სკოლების მე-6, მე-7 და მე-8 კლასის 300-მდე მოსწავლის სამთო-სათხილამურო სპორტში ჩართვის მიზნით, 2017 წლის 29 მარტიდან 4 აპრილამდე, საქართველოს სამთო კურორტებზე დასვენების მომსახურებების (CPV 80400000 - ზრდასრულების სწავლება და სხვა საგანმანათლებლო მომსახურებები) შესყიდვა, ღირებულებით - 115000 ლარი.

3. შემსყიდველი ორგანიზაციის დასაბუთება

შემსყიდველი ორგანიზაციის განმარტებით, ჯანსაღი და ფიზიკურად აქტიური ახალგაზრდა თაობის აღზრდა სახელმწიფოს ერთ-ერთ მთავარ პრიორიტეტს წარმოადგენს. ამ მიზნით განსაკუთრებულად მნიშვნელოვანია მოზარდების სპორტით დაინტერესება და მათი სპორტულ-გამაჯანსაღებელ ღონისძიებებში ჩართვა. საქართველოს განათლებისა და მეცნიერების სამინისტროს გადაწყვეტილებით, „საზაფხულო სკოლების“ პროგრამაში შესატანი ცვლილების შესაბამისად, „დავისვენოთ და ვისწავლოთ ერთად“ ქვეპროგრამის ფარგლებში, სპონტანურად დაიგეგმა ახალი აქტივობა - მთის კურორტებზე მცირეკონტიგენტაანი სკოლის მოსწავლეების დასვენება.

შემსყიდველი ორგანიზაციისვე განმარტებით, მიმდინარე საკანონმდებლო ცვლილებებიდან და პრაქტიკაში წარმოქმნილი ახალი საჭიროებებიდან გამომდინარე, შეუძლებელია წინასწარ სრულად გაიწეროს და აისახოს დასაგეგმი ყველა სასწავლო აქტივობა და მონაწილეთა ზუსტი რაოდენობა. შესაბამისად, მნიშვნელოვანია საქართველოს განათლებისა და მეცნიერების სამინისტროს ჰქონდეს საშუალება შეზღუდულ ვადებში და

ეფექტიანად განახორციელოს სასწავლო პროექტები. ზოგადსაგანმანათლებლო სკოლებში საგაზაფხულო არდადეგების პერიოდში, 2017 წლის 8-დან 15 მარტის ჩათვლით საქართველოს განათლებისა და მეცნიერების სამინისტრომ განახორციელა 300 მოსწავლისათვის ზემოაღნიშნული მომსახურების შესყიდვა. აღნიშნული აქტივობების განხორციელებას მოჰყვა პოზიტიური გამოხმაურება და დიდი დაინტერესება სხვა მოსწავლეების მხრიდან აღნიშნულ აქტივობაში მონაწილეობასთან დაკავშირებით. სახელმწიფო შესყიდვების შესახებ საქართველოში მოქმედი კანონმდებლობის თანახმად, შესყიდვის ელექტრონული პროცედურების დაცვით სახელმწიფო შესყიდვის განხორციელების შემთხვევაში, არსებობს რისკი იმისა, რომ გაჭიანურდეს საქართველოს სამთო კურორტებზე დასვენების მომსახურებების შესყიდვის პროცედურები და სათხილამურო სეზონის დასრულებამდე ვერ მოესწროს შესყიდვის განხორციელება, რაც დაგეგმილი ღონისძიების წარმართვისათვის ხელშემშლელი ფაქტორი შესაძლოა აღმოჩნდეს. აღნიშნულიდან გამომდინარე, შემსყიდველ ორგანიზაციას მიზანშეწონილად მიაჩნია, მითითებული მომსახურებების შესყიდვა განხორციელდეს გამარტივებული შესყიდვის საშუალებით.

4. დაინტერესებული პირ(ებ)ის მოსაზრება

საკითხთან დაკავშირებით დაინტერესებულ პირებს სისტემის SMP მოდულში მოსაზრება არ გამოუხატავთ.

სამოტივაციო ნაწილი

5. შემაჯამებელი დასკვნა

სააგენტომ იმსჯელა შემსყიდველი ორგანიზაციის მომართვაზე, შეაფასა მასში მითითებული ინფორმაცია და დაადგინა, რომ იგი აკმაყოფილებს სახელმწიფო შესყიდვების სააგენტოს თავმჯდომარის 2015 წლის 17 აგვისტოს № 13 ბრძანებით დამტკიცებული „გამარტივებული შესყიდვის კრიტერიუმებისა და გამარტივებული შესყიდვის ჩატარების წესის“ მოთხოვნებს.

6. სააგენტოს შეფასება

როგორც წარმოდგენილი მომართვიდან ირკვევა, შესყიდვის ობიექტია მცირე კონტიგენტია სკოლების მე-6, მე-7 და მე-8 კლასის 300-მდე მოსწავლის სამთო-სათხილამურო სპორტში ჩართვის მიზნით, 2017 წლის 29 მარტიდან 4 აპრილამდე, საქართველოს სამთო კურორტებზე დასვენების მომსახურებების შესყიდვა.

ამასთან, აღნიშნული შესყიდვების განხორციელების მიზნით, შესყიდვის ობიექტის შესასყიდად შესყიდვის ელექტრონული პროცედურების გამოყენება, „სახელმწიფო შესყიდვების შესახებ“ საქართველოს კანონისა და მის საფუძველზე გამოცემული კანონქვემდებარე ნორმატიული აქტების შესაბამისად, მიზანშეწონილი არ არის, რადგან შესყიდვის ელექტრონული პროცედურების დაცვით სახელმწიფო შესყიდვის განხორციელების შემთხვევაში, არსებობს რისკი იმისა, რომ სათხილამურო სეზონის დასრულებამდე ვერ მოესწროს შესყიდვის განხორციელება, რაც დაგეგმილი ღონისძიების წარმართვისათვის ხელშემშლელი ფაქტორი შესაძლოა აღმოჩნდეს.

სააგენტო განმარტავს, რომ ზემოაღნიშნული მომსახურებების შესყიდვასთან დაკავშირებული პროცედურების შეფერხების თავიდან აცილების მიზნით, მიზანშეწონილია, აღნიშნული შესყიდვები განხორციელდეს მაქსიმალურად შეზღუდულ ვადებში. შესაბამისად, სააგენტო მიიჩნევს, რომ სახეზეა სახელმწიფოებრივი და საზოგადოებრივი მნიშვნელობის ღონისძიების შეზღუდულ ვადებში შეუფერხებლად ჩატარებით შესყიდვის განხორციელების საჭიროება.

ამასთან, სააგენტო მოუწოდებს შემსყიდველ ორგანიზაციას, რომ მან სახელმწიფო შესყიდვები განახორციელოს „სახელმწიფო შესყიდვების შესახებ“ საქართველოს კანონის მოთხოვნათა გაწევის დაცვით, რათა უზრუნველყოფილ იქნას შესყიდვებისათვის განკუთვნილი ფულადი სახსრების რაციონალური და გამჭვირვალე ხარჯვა, კონკურენტული და არადისკრიმინაციული გარემოს შექმნით.

სარეზოლუციო ნაწილი


სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 17 აგვისტოს № 13 ბრძანებით დამტკიცებული „გამარტივებული შესყიდვის კრიტერიუმებისა და გამარტივებული შესყიდვის ჩატარების წესის“ მე-7 მუხლის პირველი და მე-6 პუნქტებით და დაადგინა:

1. დაკმაყოფილდეს საქართველოს განათლებისა და მეცნიერების სამინისტროს SMP170000849 მომართვა და შემსყიდველ ორგანიზაციას მიეცეს თანხმობა, სახელმწიფოებრივი და საზოგადოებრივი მნიშვნელობის

ღონისძიების შეზღუდულ ვადებში შეუფერხებლად ჩატარების მიზნით შესყიდვების დასადგენად მიმართოს საქართველოს მთავრობას.

2. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დ. აღმაშენებლის ხეივანი მე-12 კმ. №6), კანონმდებლობით დადგენილი წესით.

თავმჯდომარე



ლევან რაზმაძე